

## REGLUR

### um Gljúfrastein – hús skáldsins.

#### 1. gr.

Gljúfrasteinn – hús skáldsins starfar á grundvelli gjafabréfs sem undirritað var þann 21. apríl 2002 af Auði Sveinsdóttur f.h. fjölskylda Halldórs Laxness og Davíð Oddssyni forsætisráðherra. Gljúfrasteinn opnaði sem safn 4. september 2004 en fjölskylda Halldórs Laxness seldi íslenska ríkinu húsið og þau listaverk sem það prýða árið 2002 þegar 100 ár voru liðin frá fæðingu skáldsins. Við sama tækifæri gaf fjölskyldan allt innbú samkvæmt gjafabréfi.

#### 2. gr.

Gljúfrasteinn – hús skáldsins er safn í eigu íslenska ríkisins og fer mennta- og menningarmálaráðherra með yfirstjórn þess.

Hlutverk safnsins er að sýna heimili Halldórs Laxness sem lifandi safn og standa vörð um lífsstarf hans. Áhersla er lögð á að safna, varðveita, rannsaka og miðla þekkingu um verk Halldórs Laxness og ævi hans og miðla þeim fróðleik meðal annars með sýningum, útgáfum og öðrum hætti. Allir munir Gljúfrasteins skulu skráðir í viðurkennt skráningarkerfi. Safnið starfar samkvæmt söfnunar- og sýningarstefnu sem miðar að því að taka við og halda til haga öllu því er viðkemur Halldóri Laxness, verkum hans og ævi.

Safnið lánar öðrum söfnum muni á sýningar í samræmi við reglur þar að lútandi.

#### 3. gr.

Kostnaður af rekstri Gljúfrasteins – húsi skáldsins greiðist úr ríkissjóði eftir því sem ákveðið er í fjárlögum. Sértekjur safnsins eru skilgreindar í fjárlögum og verða til vegna aðgangseyris, sölu minjagripa, sérstakra viðburða eða fjárframlaga.

Safnið starfar í almannapágu.

#### 4. gr.

Ráðherra ræður safnstjóra. Um kjör fer skv. launasamningi BHM við ríkið. Ráðinn skal maður með háskólamenntun og staðgöða þekkingu á starfssviði safnsins. Stjórn Gljúfrasteins er ráðgefandi um ráðningu forstöðumanns.

Safnstjóri stjórnar starfsemi og rekstri safnsins. Hann ræður starfsmenn þess og er í fyrirsvari fyrir safnið.

#### 5. gr.

Ráðherra skipar þriggja manna stjórn sem er forstöðumanni Gljúfrasteins til ráðgjafar.

Bandalag íslenskra listamanna tilnefnir einn fulltrúa, fjölskylda Halldórs Laxness einn og einn er skipaður án tilnefningar og skal sá vera formaður.

#### 6. gr.

Safnið starfar samkvæmt safnalögum og öðrum þeim lögum sem starfsemi þess fellur undir. Safnið skal fylgja alþjóðlegum siðareglum safna sem útgefnar eru af Alþjóðaráði safna, ICOM.

#### 7. gr.

Gljúfrasteinn og safnkosturinn er í eigu ríkisins. Komi til þess að safnið verði lagt niður í núverandi mynd skal mennta- og menningarmálaráðuneyti tryggja að safnkosti þess verði ráðstafað í samráði við Þjóðminjasafn Íslands.

*Mennta- og menningarmálaráðuneytinu, 4. apríl 2012.*

**Katrín Jakobsdóttir.**

*Ásta Magnúsdóttir.*

**Fylgiskjal.**

**GJAFABRÉF**

Auður Sveinsdóttir Laxness, kt. 300718-2059, Gljúfrasteini, Mosfellsbæ, ekkja Halldórs Laxness, rithöfundar og nóbelsverðlaunahafa, gjörir með bréfi þessu kunnugt:

- 1) Að hún gefur hér með íslenska ríkinu allt innbú að Gljúfrasteini, Mosfellsbæ, sem tilheyrði heimili þeirra en nánar er um að ræða það lausafé, sem er talið upp á lista sem fylgir bréfi þessu.
- 2) Að hún gefur hér með íslenska ríkinu allt safn handrita og hvers konar annarra uppskrifta, minnisblaða og annars hand- eða vélritaðs efnis sem nú er til staðar að Gljúfrasteini og hefur að geyma hugverk Halldórs Laxness. Gjöfin er þó bundin öllum takmörkunum höfundarréttar og er einskorðuð við rit þessi sem sýningargripi. Handhöfum höfundarréttar skal á hverjum tíma heimill óhindraður aðgangur að efni þessu til hvers konar eftirgerðar, hvort sem það er eftirritun, ljósmyndun eða upptaka á tölvutækt form.
- 3) Að hún gefur hér með íslenska ríkinu allt bókasafn að Gljúfrasteini.
- 4) Að hún gefur íslenska ríkinu allt lausafé, sem ekki hefur áður verið upp talið, hverju nafni sem það nefnist og er til staðar að Gljúfrasteini við undirritun þessa gjafabréfs. Til gjafar þessarar teljast ekki þeir innbúsmunir sem til hafa komið eftir andlát Halldórs.

Gjafabréfi þessu til staðfestu ritar gefandi og Davíð Oddsson forsætisráðherra fyrir hönd gjafþega hér undir í votta viðurvist.

*Gljúfrasteini, 21. apríl 2002.*

**Auður Sveinsdóttir Laxness.**

**Davíð Oddsson** forsætisráðherra.

Vottar:

**Tómas Ingi Olrich** menntamálaráðherra.

**Jóhann Sigurjónsson** bæjarstjóri.